

堅

瓠

集

堅瓠三集卷之二目錄

忍字箴

文章九命

藥渣

裘萬頃

嘲李楊二相

姦盜以詩免

五歲能文

米雪蛆

遊春黃胖

王弇州園

嘲貴衙傳奉

錢鶴灘

爆字婁詩

咏紙梅花

嚴分宜幼頴

噴嚏

竹夫人

真西山生祠

弄猴丐

老婆牙

尋常百姓

單于問家世

巫山雲雨

失金釵

舊舞衣

閻羅見缺

到京探事

臘梨賦

蒸猪頭

楊仲舉

三聲

續衣詩

戰袍金鎖

咏松石

多少箴

馮千秋

夢徵

悼內詩

作詩寄子

閣老天官

桑寄生傳

蜂螫詩

藥名尺牘

狎媚

陳謝交嘲

麻茶直籠桶

邵康節

常省元題契

魏野詩呈王冠

張公吃酒

月夜招隣僧閒話

穀穀穀

酬嘲

使宅魚

金鯉賦詩

浪花詩

詩僧聖夢堂

陸全卿

散婦重婚

蘭節婦

涼傘詩

堅瓠三集卷之二

長洲石農耆人穫稼軒纂輯

忍字箴

陳白沙憲章忍字箴曰七情之發惟怒爲
遽衆怒之加唯忍爲是當怒火炎以忍水
制忍之又忍愈忍愈勵過一百忍爲張公
藝不亂大謀乃其有濟如其不忍傾敗立
至緇川楊洪道亦著六忍一曰忍觸二曰

忍辱三曰忍惡四曰忍怒五曰忍忽六曰
忍欲此六忍者戒之一身則一身安戒之
一家則一家安推之以處人已之間則所
遇皆安而悔尤俱寡矣

文章九命

王鳳洲有文章九命一貧困二嫌忌三玷
缺四偃蹇五流竄六刑辱七夭折八無終
九無後各有引証鳳洲于丙寅歲以瘡瘍

卧床褥者逾半載幾殆殷都過而戲曰當
加十命矣蓋謂惡疾也因引伯牛長卿等
以足之

藥渣

明吾郡陸天池才博學能文精於音律有
寓言曰某帝時宮人多懷春疾醫者曰須
勅數十少年藥之帝如言後數日宮人皆
顏舒體胖拜帝曰賜藥疾愈謹謝恩諸少

年俯伏于後枯瘠蹢躅無復人狀帝問是
何物對曰藥渣

裘萬頃

裘萬頃不樂仕進以薦者名爲司直在朝
賦詩云新築書堂壁未乾馬蹄催我上長
安兒時只道爲官好老去方知行路難千
里關山千里念一番風雨一番寒何如靜
坐茅簷下翠竹蒼梧仔細看遂乞歸

嘲李楊二相

正德中有爲詩嘲李西涯東陽楊邃庵一
清二相者云堪歎涯翁與邃翁兩人皆起
自神童文章政事不多異詭譎奸邪大畧
同考試賣題涯怎怨選官受賄邃難容皇
天莫道無陰報個個教他絕後宗巷議之
口亦可畏哉

姦盜以詩免

弘正間蘄州月舟

一作

和尚犯姦長洲知

縣某聞其能詩以鶴爲題月舟援筆曰素
身潔白頂圓朱曾伴仙人入太虛昨夜藕
花池畔過鷺鷥冤却我偷魚縣令閱詩釋
之又一婦以夫盜牛事犯上縣令詩云洗
面盆爲鏡梳頭水當油妾身非織女夫豈
曾牽牛縣尹見詩亦免其罪

五歲能文

翰林崔來鳳桐子五歲甚聰慧善屬對時
有送桃棗者急欲取之父曰汝能作此二
果破題則許卽曰有食其內而棄其外者
有食其外而棄其內者一日謂父曰以炆
爲題作一破父故效其體爲之曰有所以
眠乎人者有所以烘乎人者曰眠烘二字
不雅我爲父親改作卧字煖字

冰雪蛆

江隣幾雜誌云峨嵋雪蛆大治內熱成瘡
漫筆載曹方湖弘爲御史刷卷四川言萬
山深雪中出雪蛆遣軍士於四山高處懸
望雪中蠕蠕而動者則往取之渾如小猪
無口足眼鼻儼然蛆形也其身全脂切片
而食亦不易得癸辛雜識云西域雪山中
有蛆如蚕味甘如蜜其冷如冰名曰冰蛆
能治積熱此恐又是一種

遊春黃胖

白獺髓記開禧權臣因賜南園新成會諸
朝士席間分題有賦遊春黃胖詩云兩腳
梢空欲弄春一人頭上又安身不知終入
兒童手筋骨翻爲陌上塵傳爲朝士俞某
所作又怡顏錄載韓侂冑冬日遊西湖真
宴南園有獻迎春黃胖者命族子院判賦
詩云腳踏虛空手弄春一人頭上要安身

忽然線斷兒童手骨肉都爲陌上塵事一
而詩梢異所記亦不同戒庵漫筆載丁晉
公同夏英公看美水枕丁屬夏賦詩曰舞
拂跳珠復弄丸遮藏巧便百千般主公端
坐無由見却被旁人冷眼看

咏王弇州園

太倉王鳳洲

世貞

弇園成有題詩千壁以

諷者曰丈夫壘石易父祖積金難未雪終

天恨翻成動地歡
峻嶺悲高位深池痛九
泉燕魂來路杳擬作望雲山
蓋鳳洲乃翁思質忬因嚴嵩之怨死于西市故云或云此詩崑山王逢年作

嘲貲銜傳奉

常熟錢繼當銜尚書李石城傑在位時以貲得職銜求石城贈章石城援筆大書曰來時尙着儒生服歸去俄乘使者車唾手功

名如此易白頭才子動長吁
蘓州某公亦有作云年少功名二十收
他年何礙不公侯鈞臺昨夜因君舞
舞破簑衣舞未休嘉靖初下詔裁革
傳奉中書舍人時有集杜詩嘲之曰
馬上誰家白面郎初聞涕淚滿衣裳
可憐懷抱向人盡正想氤氲滿眼香
近侍只今難浪迹青春作伴好還鄉
三年奔走空皮骨愁日愁隨一線長

錢鶴灘

錢鶴灘福以殿撰罷官家居江陰梧塍徐氏以五百金爲脯脰延致家塾徐二子已中鄉科居半載僅改課三篇日挾妓游燕時邑令某雅好筆翰一日邀錢爲君山之遊預探齊韻中隄臍低梯艱韻戒吏人藏閨卽席發之欲以困錢酒三行請題大觀亭錢遂援筆賦云水勢兼天山作堤渚雲

烟樹望中齊直從巴峽纔歸壑許大乾坤
此結臍胸次決開三極朗目光搖動四垂
低欲騎日月窮無外誰借先生萬丈梯縉
紳莫不歎賞水南學士張公載之邑志中
一日徐賞牡丹錢飲已潦倒門客有握玳
瑁扇者取而書之曰玳瑁筵前玳瑁扇牡
丹花下牡丹詩老梅已在丈人行曾占春
風第一枝又咏楊梅詩怪殺吳人不出鄉

楊梅五月薦新嘗西州一斗蒲萄酒南越
千頭荔子漿略着些酸醒酒困了無點滓
浣詩腸渠家妃子如相見添得紅塵一倍
忙曾聞鶴灘髫時從塾歸家有客賞菊揖
之客出對曰賞菊客歸衆手折殘彭澤景
卽應曰賣花人過一肩挑盡洛陽春○又
聞鶴灘六七歲卽欲作文師出至則行矣
題傳其結句曰虛無人焉止見雞毛一堆

而已師稱賞以爲他日必能文

爆字婁詩

吳人歲除以糯穀爆字婁卜一歲之休咎
花多者吉戒庵漫筆載一詩云東八吳門
十萬家家爆穀卜年華就鍋拋下黃金
粟轉手翻成白玉花紅粉美人占喜事白
頭老叟問生涯曉來妝飾諸兒女數片梅
花插髮斜

夏都憲詩

江陰夏都憲從壽有膽瓶紙梅花詩曰誰
把并刀信手裁能於雪後見花魁北人解
奪天工巧東閣渾教夢寤猜羌笛有聲吹
不落膽瓶無水浸常開何當醉我空同酒
却詫江南驛使來李空同極賞之

嚴分宜幼穎

江陰曹野塘

忠

成化丁未進士弘治初出

宰分宜時嚴介溪嵩方成童曹識而拔之
且喜其與子弘同庚遂令同治舉業宿食
官舍見嚴所握扇有魚游景搆對語云画
扇画魚魚躍浪扇動魚游嚴卽對以繡鞋
繡鳳鳳穿花鞋行鳳舞曹一夕思家口占
曰關山千里鄉心一夜雨綿綿嚴應曰帝
關九重聖壽萬年天蕩蕩曹俱稱賞弘號
方湖亦中正德丁丑進士嚴約講兄弟禮

命子世蕃與方湖子駒輩不得越齒而坐
柄政時欲官白谷駒雲亭駕爲中書舍人
二君時飲於相府見世蕃與給事中無錫
某者夜飲強灌之給事膝行以受又故置
罰爵於給事之背不容起二君怒而斥世
蕃遂拂衣歸得不及嚴氏黨禍云

噴嚏

今人噴嚏必唾曰好人說我常安樂惡人

說我齒牙落終風之詩曰寤言不寐願言
則嚏東坡有詩云白髮蒼顏誰肯記晚來
頻嚏爲何人隨筆亦載噴嚏不止者必喫
唾祝云有人說我婦人尤甚其來已久聞
唐玄宗友愛昆季呼寧王爲大哥每與同
食食次寧王錯喉噴上髭王驚慚上顧欲
安之黃幡綽曰不是喉錯上曰何也對曰
是噴帝上大悅則固以噴嚏爲佳事矣

竹夫人

李公甫謂真西山留飲指榻間竹夫人命
題曰蘄春縣君姓竹氏可封衛國夫人公
甫援筆立就其中頌云常居大廈之間多
爲涼德之助剖心析肝陳數條之風刺摩
頂放踵無一節之瑕疵又末聯云嗚呼保
抱攜持朕不忘午夜之寢展轉反側爾尙
形四方之風俱用詩書全語而形四方之

風又見竹夫人之玲瓏也西山撫案擊節
○東坡寄柳子玉云聞道床頭惟竹几夫
人應不解卿卿又送竹几與謝秀才云留
我同行木上坐贈君無語竹夫人蓋俗謂
竹几爲竹夫人張文潛有竹夫人傳東坡
嘗云爲我周旋寧作我真一好句只是難
對平甫應聲曰因郎憔悴却羞郎○黃山
谷云竹几祇爲憇臂休膝不足當夫人之

稱日爲青奴作詩云穠李四絃風掃席昭
華三弄月侵床我無紅袖堪娛夜祇要青
奴一味涼穠李昭華貴人二女奴名

真西山生祠

鶴林玉露真西山帥長沙郡人爲立生祠
一夕有書一律於壁間者其辭云舉世知
公不愛名湘人苦欲置丹青西天又出一
活佛南極添成兩壽星幾百年方鍾間氣

八千春願祝修齡不須更作生祠記四海
蒼生口是銘

弄猴丐

法雨大師有弄猴丐詩云翻身筋斗星飛
快耳自一生從乞丐世間多少伶俐人輸
他跳出圈子外李密庵先生摸亦有詩云
跳圈終日在圈邊出入無時總失便乞丐
猴兒相覷處一圈之外又重圈

老婆牙

徐淵子舍人善諧謔丁少詹與妻有違言
棄家居茶寮茹齋誦經日買海物放生久
不歸妻求徐解之徐許諾見賣老婆牙者
買一籃餉丁作詞曰茶寮山上一頭陀新
來學得麼螭蛭螃蟹與烏鰐知他放幾多
有一物似蜂窠姓牙名老婆雖然無柰得
他何如何放得他丁大笑而歸

尋常百姓

宋楊德建號湖陰先生有陳輔者頻歲訪之
不遇題一絕於門云北山松粉未飄花
白下風輕日脚斜身是舊時王謝燕一年
一度到君家湖陰歸見詩吟賞久之稱於
荆公介甫笑曰此正戲君爲尋常百姓也
湖陰大笑

野于問家世詞

蘇東坡送子由使契丹詩末句云單于若
問君家世莫道中朝第一人用唐李揆事
也紹興中曹功顯勛使金國好事者戲作
小詞其後闕曰單于若問君家世說與教
知便是紅窓迴底兒謂功顯之父元寵昔
以此曲著名也後大璫張去爲之子安世
以閣門宣贊爲副使或改其語曰便是中
朝一漢兒蓋京師人謂內侍養子不闕者

謂漢兒也後知閤門事孟思恭亦使北或
又改曰便是塩商孟客兒謂思恭之父爲
販鹽巨賈也

巫山雲雨

裴慶餘嘗同李北門遊船舟師誤以篙水
濺侍女衣上李怒裴解以詩云滿額鵝黃
金縷衣翠翹浮動玉釵垂從教小濺羅裙
濕知道巫山雲雨歸北門笑而釋之

失金釵

歐陽文忠公任河南時染一妓時梅聖俞
謝希深尹師魯集宴後圃而歐與妓俱不
至移時方來在坐目視公責妓云何來遲
也妓曰中暑往涼堂睡着覺而失金釵猶
未見梅曰若得歐陽一詞當償釵文忠卽
云柳外輕雷池上雨雨聲滴碎荷聲小樓
西角斷虹明闌干倚遍待得月華生燕子

堅瓠集

卷二

五

飛來栖畫棟玉鈞垂下簾旌涼波動簾紋
平水晶雙枕旁有墮釵橫坐客大笑命妓
滿酌勸歐陽令公庫償釵

舊舞衣

嚴續乞韓熙載撰父神道碑珍贈外輟一
姬爲潤筆文成但叙譜系品秩葬贈之典
續封還求其改竄熙載竟以原贈吐之姬
登車書一絕於泥金雙帶云風柳搖搖無

定枝陽臺雲雨夢中歸他年蓬島音塵
斷留取尊前舊舞衣熙載笑不爲動

閻羅見缺

衢州王中甫介性輕率每語言無倫人謂
有風疾出守湖州王介甫以詩送之云東
吳太守美如何柳惲詩才未足多遙想郡
人迎下幘白蘋洲渚正滄波其意以水值
風卽起波也介諭其意遂和十篇盛氣而

誦於介甫其一日吳興太守美如何太守
從來惡祝鮀生若不爲上柱國死時猶合
代閻羅介甫笑曰閻羅見缺請速赴任

到京探事

任谷富經術隱居於洛以俟召命而蒲輪
未降乃躬詣京訪知已有朝官戲贈曰雲
間應訝鶴書遲身到京中探事宜從此見
山須合眼被山相賺已多時

臘梨賦

鄭桐庵敷教

先生吾猶及載嘉定友人某

作臘梨賦亦有思致可資談笑賦曰葫蘆
之質油灰之色盈頭以擺錫爲裝燈籠以
梅花爲式纖絨輕軟如千七之初生紫氣
光盈若點卵之乍忒其騷也與鬚子同稱
其垂也與錫鷹比德官衙每自附於總兵
排行慣託名於五十深曾智海鶴欲叫豈無

得意之秋翻歸亂釘正其被害之刻殺雞
嘗自笑其刀鈍買油竟可賒以塗額紛紛
雪下似花片之輕翻熠熠紅浮若鬼火之
騰出何須對鏡以臨粧不過盥洗而禮畢
亂曰晝夜頭光復面滑倣夫妻分不結髮
塩鹵調來煙櫃刮瘡未愈時先痛煞悲夫
人間百病俱可醫切莫生來滴瀝搭○勿
時曾聞臘梨歌云似梅花不香似雪花不
洋

似琉璃掛不得廳堂上似油灰賣不得修
船匠娘謂何我底頭好似醬黃模樣

蒸豬頭

郁履行謔浪編王中令嘗入一村寺三僧
大醉箕踞王需蔬食僧曰有肉無蔬餽蒸
豬頭甚美王曰止能飯酒食耶僧曰能詩
卽令咏蒸豚僧立就云嘴長毛短淺含臙
久向山中食藥苗蒸處已將蕉葉裹熟時

兼用杏漿澆紅鮮雅稱金盤飣白軟真堪
玉筋挑莫把瓊瓊疑作根來比並瓊根自合
喫藤條王大喜與號紫衣

楊仲舉

吾郡楊仲舉嘉德冠一時鄰家構舍其甬
溜滴其庭公不問家人以爲言公曰晴日
多雨日少或又侵其址公有普天之下皆
王土再遇些兒也不妨之句

三聲

陸象山嘗謂人家要有三聲讀書聲孩兒聲紡織聲蓋聞讀書聲覺聖賢在他口中在我耳中不覺神融聞孩兒聲或泣或笑自然籟動天鳴覺後來哀樂情致較此殊遠聞紡織聲則勤儉生涯一室兒女覺有幽風七月景象最可厭者婦人詈罵聲也惡也飲酒喧呶聲也狂也街巷笑談聲也

謫也妖冶歌唱聲也淫也與其聞此不若
聆犬聲於夜靜聽雞聲於晨鳴令人有清
曠之思

續衣詩

開元中頒賜邊軍續衣製於宮中有兵士
於短袍中得詩曰沙場征戍客寒苦若爲
眠戰袍親手作知落阿誰邊蓄意多添線
含情更著綿今生已過也重結後身緣兵

士以詩白於帥帥進之玄宗命以詩遍示
六宮曰有作者勿隱一宮人自言萬死立
宗深憫之遂以嫁得詩人仍謂之曰我與
結今生緣邇人皆感泣○玄散堂詩話縫
衣詩自太宗宮人孟浩然後鮮睹佳者近
謝幼睿一首最工不啻青出於藍也詩曰
懶向粧臺理曉粧爲郎獨自製衣裳金針
入處心俱痛素線穿時恨共長霜戶敢辭

星苑集 卷二 三
纖手冷芸窓思貼弱肌香縫成不恠無鴻
雁贏得宵來覆妾床爲一時傳誦

戰袍金鎖

唐僖宗出袍千領賜塞外吏士神策軍馬
直於袍絮中得金鎖并詩云玉燭製袍夜
金刀呵手裁鎖情寄千里鎖心終不開直
聞主將上奏上以宮人賜得鎖者後帝幸
蜀馬直前後捍禦

咏松石

秦時松封五大夫李誠之咏云半依崑岫
倚雲端獨上亭亭耐歲寒一事頗爲清節
累秦時曾作大夫官陳朝石封三品宋亦
封石盤固侯王介甫咏云草沒苔侵棄道
周誤恩三品竟何酬國亡今日頑無耻似
爲常年不與謀夫松石無知之物一經名
寵不免譏彈何士人而甘爲權門鷹犬乎

多少箴

多少箴甚有理致不知何人所作其詞云
小飲酒多暖粥多茹菜少食肉少開口多
閉目多梳頭少洗浴少羣居多獨宿多收
書少積玉少取名多忍辱多行善少干祿
便宜勿再往好事不如無

馮千秋

聞見卮言載馮千秋浙中名士崇禎乙亥

拔貢頗以詩文擅長家素封因無子買妾
維揚得小青可謂佳人才子兩相遇合後
以妻之妬置之別業似亦處之得當不意
小青才薄而年妖時人詩傳傳奇歌詠贊
歎遂使人人有一小青在其意中或以爲
小青無其人寓言情字耳而吳石渠炳之
療妬羹朱价人京藩之風流院易千秋爲
馮二官人馮致虛直等之池同顏麻子之

流以千秋之才因小青而反沒不亦冤哉

夢徵

金陵鄭沙村河爲秀才時夢中得一絕句
云城裏青山城外樓夜涼明月五更頭何
時了却心頭事重把青蚨換酒籌後登嘉
靖甲辰進士授岳州府推官到郡見城裏
青山城外樓閣宛然夢中詩句景象私心
爵爵未幾卒于任

悼內詩

于肅愍公悼夫人董氏詩十一首中一詩
云世緣情愛總成空二十餘年一夢中疏
廣未能離漢主孟光先已棄梁鴻燈昏羅
幙通宵雨花謝雕闌幕地風欲覓音容在
何處九原無路辨西東又崑山張節之和
天順間官浙江憲副寵妾新亡作詩悼之
云桃葉歌殘思不勝西風吹淚結紅水樂

天老去風流減子野歸來感慨增花逐水流春不管雨隨雲散事難憑夜來書館寒威重誰送薰香半臂綾一作皆膾炙於世後作尤勝

作詩寄子

宋洪浩遊太學十年不歸其父作詩寄浩曰太學何蕃且一歸十年甘肯誤庭闈休辭客路三千遠須念人生七十稀腰下雖

無季子印篋中幸有老萊衣歸時定約春
前後免使高堂賦式微浩得詩卽告歸養
洪武中錢塘吳慥官四川其父敬夫思之
作詩云劍閣凌雲鳥道邊路難聞說上青
天山川萬里身如寄鴻雁三秋信不傳落
葉打牕風似雨孤燈背壁夜如年老懷一
掬鍾情淚幾度沾衣獨泫然敬夫卒而慥
始以丁憂還家夫啣命千里羈身宦轍猶

曰王事靡盬不遑將母今有捨垂白之親而遠遊干謁使其親倚廬涉屺目窮心折者則前詩可念也

閣老天官

桐下閒談載嘉靖設朝大學士嚴嵩吏部尙書熊浹被召來迎世廟因出對云閣老心高高似閣二臣惺悚伏地不能對世廟好言慰之云朕爲代對天官膽大大如天

桑寄生傳

常熟蕭觀瀾字鳳儀因同邑有桑某所
行不謹作桑寄生傳以譏之取樂名成文
足稱工巧傳云桑寄生者常山人也爲人
厚朴少有遠志讀書數百部長而益智不
凡雌黃今古談辭如玉屑狀貌瑰異龍骨
而虎睛膂力絕人運大戟八十斤走及千
里馬與劉寄奴爲布衣交劉卽位拜爲將

軍曰含雞舌侍左右恩幸無比薦其友周
升杜仲馬勃上召見之曰公等所謂參苓
芝朮不可一日無者也何相見之晚耶生
卽進曰士以類合猶磁石取針琥珀拾芥
若用小人而望其進賢是猶求柴胡桔梗
於菹澤也然頗好佛與天竺黃道人密陀
僧交最善從容言于上上惡其異端弗之
用木賊反自號威靈仙與辛夷前胡相結

連犯天雄軍上謂生曰豺狼毒吾民奈何
生曰此小草寇臣請折箠笞之上大喜賜
穿山甲犀角帶問何時當歸對曰不過半
夏遂帥兵往乘海馬攻賊大戰百合流血
餘數里令士卒負大黃發赤箭賊不能當
遂走絆于鐵蒺藜或踐滑石而墮悉追斬
之惟先降者獨活以延胡索繫之而歸獲
無名異寶不可勝計或曰馬援以薏苡興

謗此不可留也俱籍獻之上迎勞生曰卿
平賊如剪草孫吳不能過也因呼爲國老
而不名生益貴賞賜日積鍾乳三千兩胡
椒八百斛以真珠買紅娘子爲妾紅娘子
者有美色髮如蜀漆顏如丹砂體白而乳
香生絕愛之以爲牡丹芍藥不能與之爭
妍也上聞賜以金銀花玳瑁簪月給胭脂
胡粉之費一日上見生體羸謂曰卿大腹

頓減非以好色故耶宜戒淫欲節五味以
自養且令放遠其妾生不得已贈以青箱
了而遣之然思之不置遇秋風起因取破
故紙題詩以寄之曰牽牛織女別經年安
得鸞膠續斷絃雲母帳空人不見水沉香
冷月娟娟澤蘭憔悴渚蒲黃寒露初凝百
草霜不共玉人傾竹葉茱萸并菊自重陽
妾荅之曰菟絲曾附女蘿枝分手車前又

幾時羞折黃花簪鳳髻
懶將青黛掃蛾眉
丁香謾比愁腸結
豆蔻長含別淚垂
願學雲中雙石燕
庭烏頭白竟何遲
一作天門
冬日曉蒼涼
落葉愁驚滿
地黃清淚暗消
輕粉面凝塵
閒鎖鬱金裳
石連未嚼心先
苦
紅豆相看恨更長
鏡裏孤鸞甘遂死
引年何用覓昌陽
生得詩情不自勝
乃言於上
召之使還
然生旣溺於欲
又不能防風

寒所侵寢以成疾面生青皮兩手如乾薑
皤然白頭翁也上疏乞骸骨王不留行諭
之曰吾曩者預知子之有今日矣賜神曲
麴酒百斛以皂角巾歸第養疾而卒作史
君子曰桑氏出於秦大夫子桑生蓋桑白
皮之後也有名黠黠者亦其遠族生少孤
乳僅知母而不識父卒能以才見於時非
所謂郗林之桂枝沅江之鱉甲也與其後

耽於女色甘之如石蜜而忘其苦於熊膽
美之如琅玕而不知毒甚於易蛇也迷而
不悟卒以傷生惜哉

蜂螫詩

江道行夏日遭蜂螫之毒檢方無得戲作
藥名詩曰蟬蛻連翹纔半夏柴胡逞毒肉
從容疾藜刺若細辛箭荊芥芒同大戟鋒
獨活急當歸草果苦生參還續斷蜈蚣破

故紙同香白紙並從今防已更防蜂風

藥名尺牘

吳妓詹愛雲寄所歡周心恒書云檳榔一
去已過半夏更不當歸耶盼望天南星大
腹皮忍冬藤矣誰史君子效寄生草纏繞
他枝使故園芍藥花無主耶妾盼不見白
芷書茹不盡黃連苦古詩云萱草不消心
上恨丁香空結雨中愁奈何奈何心恒答

曰紅娘子一別桂枝香已凋謝矣幾思菊
花茂盛欲歸紫苑奈常山路遠滑石難行
況今木賊竊發巴戟森森豈不遠志乎姑
待從容耳卿勿使急性子罵我曰蒼耳子
狠心哉不至白頭翁而亡則不佞回鄉時
自有金銀花相贈也

狎媚

謝希孟好狎媚陸象山責之曰士君子朝

夕與賤娼居獨不媿名教乎希孟敬謝請
後不敢他日復爲娼建鴛鴦樓象山又以
爲言謝曰非特建樓且爲作記象山喜其
文不覺曰樓記云何謝卽朗誦首句云自
遜抗機雲之死而天地英靈之氣不鍾於
世之男子而鍾於婦人象山默然希孟一
日忽起歸與娼追送江滸涕泣戀戀希孟
毅然書一詞與之云雙漿浪花平夾岸青

山鎖你自歸家我自歸說着如何過我斷
不思量你莫思量我將你從前與我心付
與他人呵

陳謝交嘲

陳伯益面黑而狹多髯寫真掛壁上謝希
孟見之戲題云伯益之面大無兩指髭髯
不仁侵擾乎旁而不已於是乎伯益之面
所存無幾希孟後改名直字古民伯益咏

其各曰炊餅担頭挑取去白衣舖上喝將來伯益又寫一真衣阜道服躡僧鞋希孟贊曰禪鞋俗人鬚鬢道服儒巾面皮秋水長天一色落霞孤鶩齊飛見者絕倒

麻嗒直籠桶

王荊公百家詩選載唐李涉題宇秀才櫻桃詩云風流莫占少年家白髮殷勤最戀花今日顛狂君莫笑趣愁得醉眼麻嗒今

人欲睡眠將合睫而縫細者曰麻索卽此
二字又物之擁腫者俗曰直籠上聲桶詩
作籠統韋安居梅磳詩話記鄭安曉丞相
未貴時賦冬瓜詩云剪剪黃花秋後春霜
皮露葉護長身生來籠統君休笑腹內能
容數百人又唐人張打油雪詩云江上一
籠統井上黑窟籠黃狗身上白白狗身上
腫

邵康節

邵康節會有四不赴謂官府公會不相識
會大衆廣會勸酒醉會又有四不出謂大
寒大暑大雨大風有五樂謂樂生中國樂
爲男子樂爲士人樂見太平樂聞道義有
五喜謂喜見善人喜見好事喜見美物喜
見嘉景喜見大禮有四幸謂年長年爲壽
城幸豐年爲樂國幸清閒爲福德幸安康

爲福力有三惑謂年老不歇爲一惑安而
不樂爲二惑閒而不清爲三惑

常省元題契

趙尙書 家與常省元 園相近趙百計
謀之省元立契作詩於後曰乾坤到處是
吾亭機械從來未必真覆雨翻雲成底事
清風明月冷閒人蘭亭契事今非晉桃洞
神仙也笑秦園是主人人是客問君還有

幾年身尚書慚歸其券

魏野詩呈王寇

宋王旦從東封回過陝魏野寄詩云聖朝
宰相年年出君在中書十二秋西祀東封
俱已了好來相伴赤松遊且袖此詩求退
寇準自永興被召野亦以詩送之云好去
上天辭富貴却來平地作神仙準得詩不
悅後二年貶雷州遂題前詩於牕朝夕吟

哦

張公吃酒李公醉

郭景初夜出爲醉人所誣官召景初詰其
狀景初歎曰諺云張公吃酒李公醉官卽
命作賦景初云事有不可測人當防未然
何張公之飲酒乃李公之醉焉清河丈人
方肆盃盤之樂隴西公子俄遭酩酊之愆
官笑而釋之

月夜招隣僧閒話

拊掌錄許義方妻劉氏端潔自許義方出
經年始歸語妻曰獨處無聊亦與隣里親
戚姬家往還乎劉曰自君之出足未嘗履
闕義方咨嘆不已又問何以自娛荅曰惟
時作小詩以遣情耳義方欣然索詩稿觀
之開卷第一題云月夜招隣僧閒話

穀穀穀

華原令崔思海口吃與表弟杜延業遞相
戲弄杜嘗語崔云弟能遣兄作雞鳴但有
所問兄須卽荅旁人訝之與杜私賭杜將
穀一把以示崔問曰此是何物崔曰穀穀
穀旁人大笑輸物與延業

酬朝

唐方干瘦而唇缺好侮人嘗與主簿李基
同酌李目有翳干作一令曰措大吃酒點

塩軍將喫酒點醬只見門外着籬未見眼中安障李卽荅曰措大喫酒點塩下人喫酒點鮓只見手臂着襴未見口唇開袴又陳亞善滑稽蔡君謨以其名戲之曰陳亞有心絕是惡陳卽復曰蔡襄無口便成衰時人絕倒侮人者定爲人侮可爲輕噪之戒○陳亞自爲亞字謎曰若教有口便啞且要無心爲惡中間全沒肚腸外面任生

稜角

使宅魚

錢武肅時西湖漁者日納魚數觔謂之使宅魚有不及數者必市以供頗爲民害羅隱侍坐壁間有蟠溪垂釣圖武肅令隱詠之隱應聲曰呂望當年展廟謨直須釣國更誰如若教生在西湖上也是須供使宅魚武肅大笑遂蠲其例

金鯉賦詩

弘治中衢州鄒德明月夜泊舟太湖椒山下吟詩二絕云一湖煙水綠如羅蘋藻涼風起白波何處扁舟歸去急蒲篷殘雨夕陽多浦口風回拍浪沙天涯行客正思家歸舟疑是洪都晚孤雁低飛帶落霞俄聞溪上笑語聲見一美女德明趨岸揖而問之女曰妾生長於斯今當良夕偶爾游行

德明曰舟中無客肯過訪否女卽携手同行對酌篷牕下女以浪花爲題請聯一律德明曰不欲天邊帶露裁只憑風信幾番催女曰一枝纔見逶迤動萬朶俄驚頃刻開德明曰盆浦秋容和雨亂鏡湖春色逐人來女曰分明一幅西川錦安得良工仔細裁詩成鼓掌大笑已而就寢比明女忽披襟投水中視之一金鯉悠然而遊

浪花詩

夸堅志曹道冲售詩於京都隨所命題卽就群不逞欲苦之乃求浪花絕句且以紅字爲韻曹謝不能且語之曰菊坡王輔道學士能之羣不逞曰彼在館閣吾儕小人豈容輒詣曹曰試賫佳紙筆往拜而求之於是相率修謁下拜有請王欣然捉筆書一絕云一江秋水沒寒空漁笛無端弄晚

風萬里波心誰折得夕陽影裏碎殘紅讀
者歎服

詩僧噩夢堂

陸儼山詩話國初越中詩人劉孟熙唐處
敬輩一日覓舟游集曹娥祠餘姚詩僧噩
夢堂附舟他往敝衣坐船尾衆不識夢堂
以其貌寢易之已而分韻賦詩殊不之顧
夢堂不覺技癢乃請曰諸公間有落韻母

客見施客曰若亦能詩乎以蕉字與之俄
頃詩成夢堂以浙音誦之曰平明飲罷促
高標一作撐出五雲門外橋離越王城一
百里到曹娥渡十分潮白飄一作晴雪楊
花落一作浪綠美晚風蒲葉搖西北陰沉
天欲雨卧聽蓬上學芭蕉此體宜浙音且
戲之客詢之知爲夢堂衆皆媿謝

悼陸全卿

吳人悼冢宰陸全卿完坐宸濠黨詩曰子
規聲裏夕陽微何事先生懶見幾雲夢竟
成韓信縛鱸魚空待季鷹歸功名到此分
成敗史筆憑誰定是非寂寂朱門春去也
楊花燕子任爭飛或謂唐伯虎作又傳全
卿受賄復宸濠護衛濠敗吳人口號曰五
錢九分六錢輕陸全卿做到天官弗肯行
受子宸濠三千兩合家老少上京城

婦散重婚

吳士姜子奇娶婦三載值淮張據吳明兵
臨城下子奇挾妻出避愴惶間因失其妻
爲領官兵攜歸京邸子奇流落四方者數
年行乞至京有高門一婦人見之而泣貽
酒饌米囊急使之去子奇不敢仰視翌日
復乞于此婦呼與語又爲主女所見白母
令人追之檢其囊中有金釵一隻書一封

因告其失啓視之則律詩一首云夫留吳
越妾江東三載恩情一旦空葵藿有心終
向日楊花無力暫隨風兩行珠淚孤燈下
千里家江一作山一夢中每悵妾身羅此難
相逢媿把姓名通一作有書誰寄子奇翁官兵見詩
憐之卽遣還仍給錢米以資其歸

藺節婦

輟耕錄陳友諒部將鄧平章陷江西諸郡

豐城汪某以千金賂鄧之帥某求免剽戮
帥聞其妻藺氏色美反殲其家獨生藺及
四歲嬰將納之婦曰帥貴人也妾事之無
恨但吾夫初喪請持一月服乃爲帥婦未
晚帥從之移兵他郡命二姬守之越數日
藺俟二姬熟睡乃先殺嬰齒指血書壁曰
涇渭難分濁與清此身不幸厄紅巾孤兒
豈忍從他姓烈婦何曾嫁兩人白刃自揮

心似鐵黃泉欲到骨如銀荒村日落猿啼處
過客聞之亦慘神書畢自刎鄧聞之陳
陳罪帥而爲藺立廟

涼傘詩

蘓州一僧能詩頗捷給善謔當塗遇太守
失避守命賦涼傘詩僧賦云衆骨攢來一
柄收黃羅銀頂覆諸侯當時撐向馬前去
真個有天沒日頭守聞之色媿